

11/11/1999

Parlimen dibubar hari ini (HL)

PUTRAJAYA, Rabu - Parlimen dan Dewan-dewan Undangan Negeri di Semenanjung dibubarkan esok bagi membolehkan pilihan raya umum kesepuluh diadakan.

Suruhanjaya Pilihan Raya (SPR) akan bermesyuarat Jumaat ini bagi menetapkan hari penamaan calon dan tarikh pengujaan undi.

Pengumuman pembubaran Parlimen kesembilan itu dibuat oleh Datuk Seri Dr Mahathir Mohamad dalam sidang akhbar khas di sini petang ini, selepas beliau mendapat perkenan Yang di-Pertuan Agong, Sultan Salahuddin Abdul Aziz Shah, pagi tadi.

Perlembagaan menetapkan pilihan raya umum mesti diadakan dalam tempoh 60 hari selepas Parlimen dibubarkan. Bagaimanapun, tiga pilihan raya umum sebelum ini diadakan dalam tempoh 16 hingga 20 hari dari tarikh pembubaran Parlimen.

Perisytiharan pembubaran Parlimen oleh Yang di-Pertuan Agong dibacakan oleh Yang Dipertua Dewan Rakyat, Tun Mohd Zahir Ismail, ketika sesi petang bermula pada 2.30 petang ini.

Serentak itu, sesi persidangan Dewan Rakyat kali ini, yang bermula 14 hari lalu dan sedang membahaskan Belanjawan 2000, ditangguhkan apabila ahli sebulat suara meluluskan usul pembubaran Parlimen kesembilan.

Zahir juga turut memaklumkan pembubaran itu kepada Pengerusi SPR, Datuk Omar Hashim. Ini adalah kali pertama Parlimen dibubarkan ketika Dewan Rakyat bersidang.

Pagi tadi, Perdana Menteri dan timbalannya, Datuk Seri Abdullah Ahmad Badawi menghadap Yang di-Pertuan Agong di Istana Negara, bagi mendapatkan perkenan Seri Paduka.

Dr Mahathir berkata, beliau sudah menasihatkan kerajaan-kerajaan negeri membubarkan Dewan Undangan Negeri esok.

"SPR yang juga sudah dimaklumkan, akan menentukan hari penamaan calon dan hari pengujaan undi," katanya.

Penggal lima tahun Parlimen sekarang berakhir Jun depan tetapi spekulasi mengenai pilihan raya umum diadakan lebih awal bermula sejak tahun lalu. Andaian itu hampir pasti apabila Dr Mahathir membatalkan kehadirannya di Persidangan Ketua Kerajaan Komanwel di Afrika Selatan malam tadi.

Seramai 9.7 juta pengundi berdaftar layak mengundi pada pilihan raya umum kali ini bagi memilih 193 ahli Parlimen dan 394 ahli Dewan Undangan Negeri di Semenanjung.

Pilihan raya Dewan Undangan Sarawak dan Sabah diadakan berasingan. Pilihan raya negeri Sabah diadakan Mac lalu, manakala Sarawak hanya perlu mengadakan pilihan raya pada tahun 2001.

Pada pilihan raya umum 1995, Barisan Nasional (BN) memenangi 162 kerusi Parlimen, manakala pembangkang mendapat 30 kerusi. Di peringkat negeri, BN memenangi 338 kerusi, manakala 56 lagi dikuasai pembangkang.

Bagaimanapun, jumlah kerusi Parlimen BN meningkat kepada 166, antaranya ekoran kemasukan anggota pembangkang. Begitu juga di dewan undangan negeri, jumlah kerusi BN bertambah kepada 349, sebahagian besarnya daripada bekas anggota S46 yang menyertai Umno.

Dalam sidang akhbar yang penuh sesak dan turut dihadiri pemimpin parti-parti komponen BN itu, Dr Mahathir berkata, keputusannya itu dibuat bagi membolehkan pilihan raya diadakan sebelum Ramadan, sekali gus mengelak kegiatan kempen yang boleh mencemar kesucian bulan puasa.

"Kita mulanya fikir patut adakan pilihan raya selepas raya tetapi kita dapati kalau adakan pilihan raya lepas raya, bermakna selepas puasa. Maka

sepanjang bulan puasa, akan ada kegiatan yang tidak baik.

"Waktu itu, orang Islam yang ingin membuat ibadat, puasa, sembahyang, sembahyang terawih, akan diganggu pihak tertentu yang akan cuba menggunakan masjid, surau, tempat-tempat ibadat yang lain, untuk berkempen.

"Dan dalam kempen ini mungkin guna perkataan yang kesat, fitnah, pembohongan dibuat, maki hamun dan mencarut. Ini amat tak sesuai dengan bulan puasa. Selain itu, kita juga kkuatir ada pihak tertentu yang akan cuba menggagalkan pilihan raya ini dengan mengadakan demokrasi dan rusuhan terutama apabila mereka dapati mereka tidak boleh menang," katanya.

Menjawab satu soalan, Dr Mahathir menegaskan, pilihan raya adalah satu urusan serius dan BN menghadapinya bagi menentukan siapa yang akan membentuk kerajaan.

"Saya menghadapi pilihan raya bukan untuk menguji populariti saya berbanding seseorang. Pilihan raya adalah satu urusan yang serius dan kita hadapi pilihan raya untuk menentukan siapa yang akan membentuk kerajaan.

"Saya tidak kisah sama ada saya popular atau tidak. Apa yang penting ialah negara ini mendapat sebuah kerajaan yang baik," katanya.

Beliau yakin BN akan berjaya mengekalkan majoriti dua pertiga pada pilihan raya kali ini.

"Saya bukannya ingin mendapat apa-apa untuk diri saya. Saya ingin berusaha untuk negara ini dan saya tidak kisah sama ada saya tercatat dalam sejarah sebagai seorang yang baik atau jahat.

"Yang penting ialah apa yang dicapai untuk negara ini oleh kerajaan BN," katanya.

(END)